

# Proslavimo zajedno

# Međunarodni dan maternjeg jezika

## 21. februar

Šta je Međunarodni dan maternjeg jezika?

To je dan posvećen promoviranju **jezičke i kulturne raznolikosti** i **višejezičnosti** u svijetu. Obilježavanje **Međunarodnog dana maternjeg jezika** ustanovila je organizacija **UNESCO** 1999. godine. Taj se dan obilježava **21. februara**.

Zašto slavimo Međunarodni dan maternjeg jezika?

**Međunarodni dan maternjeg jezika** slavimo

- da istaknemo važnost **učnja** jezika za razvoj **višejezičnosti** i **razumijevanja** među ljudima koji pripadaju različitim kulturama,
- da promoviramo i sačuvamo bogatu jezičku i kulturnu **raznolikost** svijeta i
- da ukažemo na važnost **prava** na izražavanje i obrazovanje na **maternjem jeziku**.

Šta je maternji jezik?

U svijetu danas postoji oko 7000 jezika. Ljudi mogu poznavati jedan ili više jezika. **Maternji jezik** je onaj koji ljudi najprije nauče, **prvi jezik**, jezik koji usvoje **prirodno**, bez napora, u sredini u kojoj odrastaju, bez ikakve posebne obuke ili nastave.

Kako da se odnosimo prema maternjem jeziku?

Svoj maternji jezik treba da **volimo**. A ljubav prema svome jeziku najbolje se pokazuje njegovim **korištenjem** i **čuvanjem**. Dužni smo jezik **prenijeti** i generacijama koje će doći poslije nas. **Nemamo pravo** lišiti ih naslijeđa koje im pripada. Ljubav prema maternjem jeziku **ne smije nas spriječiti da učimo strane jezike**. Tuđi maternji jezik treba **poštovati**. Treba poštovati **pravo** svake jezičke zajednice da svoj jezik **imenuje** onako kako ona smatra da je najbolje.